

# Pisortanit ikiorsiissutit pillugit Inatsisartut peqqussutaat

Suliassaqartitsiniarnermik inunnillu isumaginninnermik Kalaallit Nunaannut Inatsimmi nr. 580-imi, 29. november 1978-imeersumi § 2 naapertorlugu makku aalajangersarneqarput:

## Kapitel 1

### *Siunertaq inuttullu ataasiakkaatut akisussaaffik*

§ 1. Peqqussummi matumani siunertarineqarpoq inunnut Kalaallit Nunaanniittunut allatut iliornikkut imminnut pilersorsinnaangitsunut tamanut aningaasaqarnikkut isumannaallisaaviginninnissaq. Inuit imminnut ilaquttaminnullu pilersuisinnaangitsut pilersuinermut akiligassanullu aalajangersimasunut aningaasatigut ikiorserneqarnissaat peqqussutikkut aamma isumagineqassaaq.

§ 2. Inatsisartut peqqussutaat una naapertorlugu kialuunniit pisussaaffigaa imminut, katissimallugu aapparisaanik qitornaminillu 18-it inorlugit ukiulinnik pilersuinissani.

*Imm. 2.* Katissimallugu aapparmik pilersuisussaataaneq atuukkunnaartarpoq averusernikkut imaluunniit avinnikkut.

*Imm. 3.* Qitornamik pilersuisussaataaneq makku pissutigalugit atuukkunnaartarpoq

1) qitornaq nammeneq katissimallugu aapparminik imaluunniit qitornaminik pilersuisussaataaleraangat, imaluunniit

2) paniusoq naartunerminut atatillugu pisortanit ikiorsiissutisiaqaleraangaat.

## Kapitel 2

### *Piumasaqaatit nalinginnaasut*

§ 3. Kinaluunniit Kalaallit Nunaanniittoq tassanngaannartumik pisariaqavissumik pissaaleqilernermit pisortanit ikiorserneqartussaataavoq, tamatumani imminut ilaquttaminillu pilersuisinnaangikkuni.

§ 4. Pilersuinermit akiligassanullu aalajangersimasunut kiisalu immikkut ittumik pisoqartillugu pisortanit ikiorsiissutit pisinnaanermut piumasaqaataapput qinnuteqartup Kalaallit Nunaanni najugaqartuunissaa inuillu allattorsimaffiannut nalunaarsimanissaa makkuninngalu naammassinnissimanissaa:

1) danskit nalagaaffianni innuttaanissamik,

2) danskit naalagaaffianni innuttaasumut katissimanissaa imaluunniit kingullermik katikkami danskit naalagaaffianni innuttaasumut katissimanissaa imaluunniit

3) nunanut allanut imaluunniit nunat tamalaat akornanni kattuffinnut isumaqatigiissutini, danskit nalagaaffianni innuttaanngitsut Kalaallit Nunaanniinnerminni ataavartumik pilersuinnermut akiligassanullu aalajangersimasunut ikiorsiissutisisinnaatitaanerannik imalinni, ilaanissaa.

*Imm. 2.* Inatsisartut peqqussutaat una naapertorlugu pisortanit ikiorsiissutininik tunniussisoqarsinnaavoq, pisariaqartitsineq ikiorsiissutit allat atorlugit pisinnaanngikkaangat.

**§ 5.** Katinnikkut aappariinneq pillugu inatsit naapertorlugu imaluunniit meeqqat inatsisitigut illersugaanerat pillugu inatsit naapertorlugu pineqartoq allamut ikiorsiissutininik pisartagaqartumut akilersuuteqartussaataaappat, pisortat akilersuuteqartussaataasumut piumasaqaataasunut atatillugu piumasaqaateqartussaataalissapput ikiorsiissutigineqartartut nalingat tikillugit annertussuseqarsinnaasunik, tamatumani pilersuisussaataaneq § 2-mi maleruagassat naapertorlugit atorunnaareersimagaluarpalluunniit.

*Imm. 2.* Pisortat akilersuutit aalajangersarneqarnissaannik qaffanneqarnissaannilluunniit piumasaqaateqarsinnaasussanngussapput.

**§ 6.** Pilersuinnermut akiligassanullu aalajangersimasunut, takuuk § 13, kiisalu immikkut ittumik pisoqartillugu, takuuk § kapitel 6, pisortanit ikiorsiissutininik qinnuteqaat najugaqarfigalugu kommuunimi kommunalbestyrelsimut tunniunneqassaaq.

*Imm. 2.* Tassanngaannartumik ikiorsiissuteqartoqarnissaanik qinnuteqaat, takuuk § 3, najugaqarfigalugu kommuunimi kommunalbestyrelsimut tunniunneqassaaq.

### **Kapitel 3**

#### *Pisortanit ikiorsiissutininik pissarsinissamut piumasaqaatit*

**§ 7.** Kommunalbestyrelsi tassanngaannartumik pisariaqavissumik pissaaleqilernerme pisortanit ikiorsiissuteqarsinnaavoq qinnuteqartoq

1) inooqatigiinnermi pisimasumik, soorlu nappaammik, erninermik, suliffissaarunnermik inooqatigiikkunnaarnermilluunniit nalaataqarsimappat, aamma

2) imminut ilaqtutaminillu pilersuinnermut akiligassanullu aalajangersimasunut pisariaqartitaminik pissarsisinnaanngippat.

**§ 8.** Kommunalbestyrelsi pilersuinnermut akiligassanullu aalajangersimasunut kiisalu ataasiartumik aningaasartuutitut pisortanit ikiorsiissuteqarsinnaavoq, qinnuteqartup § 7-imi piumasaqaatit naammassisimappagit kiisalu

1) suliffissaqanngikkuni suliffissaminillu naammaginartumik neqeroorfigineqarsimanngikkuni pimoorullugulu suliassarsiortuunngikkuni

2) sungiussiniarnermigut ajornartorsiornini, peqqinnginnini assigisaallu pissutigalugit sulisinnaanngitsutut nalilerneqaruni imaluunniit

3) napparsimaguni imaluunniit erninermut atatillugu sulinngiffeqaruni taamalu sulisinnaanani.

*Imm. 2.* Naalakkersuisut pilersuinnermut akiligassanullu aalajangersimasunut kiisalu ataasiaannartumik aningaasartuutissanut pisortanit ikiorsiissutisisinnaanermut piumasaqaatit pillugit maleruagassanik

aalajangersaasinnaapput, tassunga ilanngullugu sulilernissamut piareersimanissamut piumasaqaatinik qaqugukkullu qinnuteqartoq sulisinnaangitsutut nalilerneqartassanersoq.

## Kapitel 4

*Innersuussineq, siunnersuineq, iliuusissanik pilersaarusiaq malittarinninnerlu*

*Innersuussineq aamma siunnersuineq*

**§ 9.** Kommunalbestyrelsi pilersuinermit akiligassanullu aalajangersimasunut pisortanit ikiorserneqarnissamik qinnuteqartoqaraangat innersuussisassaaq, qinnuteqartup pisortanit ikiorsiissutisartussatut, suliffeqarnermi tapiissutisartussatut allatulluunniit attuumassuteqartumik ikiorserneqarnissaa siunertaralugu.

**§ 10.** Kinaluunniit pilersuinermit akiligassanullu aalajangersimasunut pisortanit ikiorsiissutininik qinnuteqartoq kommunalbestyrelsimit siunnersorneqarnissamik piumasaqarsinnaavoq, tassanngaannartumik imaluunniit nalaakkumaakkaminik aningaasatigut ajornartorsiulissaguni sapinngisamik nammineerluni qaangiiniarnissaminut, ungasinnerusorlu isigalugu imminut ilaqtutaminillu pilersuisinnaanissaminut.

*Imm. 2.* Siunnersuinermit inuup atugai ataatsimut isigalugit isummerfigineqassapput pilersuisinnaannginnermit tunngaviusoq kisiat isiginagu. Siunnersuineq saaffigisinnaasamut allamut attaveqalernissamut ikiuinerusinnaasinnaavoq, soorlu suliffissarsiuussisarfimmut, atornerluinermik katsorsaasarfimmut, peqqinnissaqarfimmut inissiaatileqatigiinnulluunniit. Siunnersuineq inunnut ataasiakkaanut ataatsimoortunulluunniit ingerlanneqarsinnaavoq.

*Imm. 3.* Kisimiillutik pilersuisut ilaqutariillu meerartallit pisortanit ikiorsiissutisiaqalernerannut atatillugu sapinngisamik piaarnerpaamik siunnersuineq neqeroorutigineqartassaaq, tamannalu meeqqanik inuusuttunillu kommunalbestyrelsip ilitsersuillunilu nakkutilliisussaataitaneranut atasutut isigineqassaaq.

*Iliuusissanik pilersaarusiaq*

**§ 11.** Pilersuinermit akiligassanullu aalajangersimasunut pisortanit ikiorsiissutisartut imminut tunngasumik iliuusissatut pilersaarusiunneqarnissamut pisinnaatitaavoq kommunalbestyrelsi suleqatigalugu, takuujulli imm. 3.

*Imm. 2.* Iliuusissatut pilersaarusiaq siunnersuisimanermik aallaaveqassaaq aammalu makku pillugit ilitsersuutininik imaqaqalluni:

- 1) Atornerluinermik katsorsarneqarneq.
- 2) Inuttut ineriartorneruneq.
- 3) Pisinnaanngorsarneq.
- 4) Ilinniartitaaneq.
- 5) Sulilersitaaneq.
- 6) Suliffimmik attassisinnaaneq.
- 7) Piginnaanngorsaaqqinneq
- 8) Ilinniarteqqinneqarneq.

*Imm. 3.* Inuit pilersuinnermut akiligassanullu aalajangersimasunut pisortanit ikiorsiissutininik piniarlutik saaffiginninnerminni annerpaamik ullunik 14-inik sivisussusilimmik ikiortinniartut imminerminnut tunngasumik iliuusissatut pilersaarusiunneqartassanngillat.

*Imm. 4.* Imminut tunngasumik iliuusissatut pilersaarut malinnaatinneqartassaaq pilersuinnermut akiligassanullu aalajangersimasunut pisortanit ikiorsiissutininik pisoq inatsisiliorneq alla naapertorlugu allatut ikiorneqalerpat, imminut tunngasumik iliuusissatut pilersaarusiortoqarnissaanik imaluunniit piginnaanngorsaaqqinnermut pilersaarusiortoqarnissaanik piumasaqaateqartoqarluni. Inatsisiliorneq alla naapertorlugu taamatut pisoqassappat iminnut tunngasumik iliuusissatut pilersaarusiaaersoq imaluunniit piginnaanngorsaaqqinnermut pilersaarusiaaersoq najoqqutassatut aallaaviusinnaavoq.

*Imm. 5.* Pisortanit ikiorsiissutininik pisartagalik imminut tunngasumik iliuusissatut pilersaarusiortfigineqareerluni kommuunimut allamut nuuppat nuuttutullu nalunaarluni, kommuunip nuuffigisaata kommuunimit nuuffigineqartumit piniassavaa iliuusissatut pilersaarusiaq.

*Imm. 6.* Naalakkersuisut pineqartumut imminut tunngasumik iliuusissat suliarineqartarnerat pillugu maleruagassanik aalajangersaasinnaapput.

#### *Malittarinninneq*

**§ 12.** Kommunalbestyrelsip iliuusissatut pilersaarut naliliiffigeqqissinnaavaa iluarsiiiffigalugulu, takuuk § 11, pisariaqartitsineq naapertorlugu, taamaaliornikkut qulakkeerniarlugu pilersuinnermut akiligassanullu aalajangersimasunut pisortanit ikiorsiissutisinissamut piumasaqaatit sulii naammassineqarsinnaanersut.

*Imm. 2.* Annikillisamik § 13, imm. malillugu ikiorsiissutisiaqartitsisoqarpat, kommunalbestyrelsi qaammatip ataatsip qaangiunnerani naliliissaaq sulii nammineq pisuussutigisamik pissaaleqisoqarnersoq.

### **Kapitel 5**

#### *Pilersuinnermut akiligassanullu aalajangersimasunut pisortanit ikiorsiissutit tunniunneqartarnerat*

#### *Naatsorsorneqarnerat*

**§ 13.** Pilersuinnermut akiligassanullu aalajangersimasunut pisortanit ikiorsiissutisiat annertussusaat missiliuussinikkut aalajangerneqartarpoq qinnuteqartup maannamut inuuniarnikkut atugarisimasai, pilersuisutut pisussaaffii, katissimallugu aapparisaq, nalunaarsorneqarsimasumik aapparisaq imaluunniit naligisatut inooqatigisap isertitai, akiligassat aalajangersimasut najukkamilu pissutsit tunngavigalugit.

*Imm. 2.* Taamaallaat pisartagaqartumut taassumalu ilaqutaanut pisariaqavissutigut pilersornissaannut ikiorsiissutininik tunniussisoqarsinnaavoq aammalu ineqarnermut akiliummut, atuinermut aningaasartuutitut aningaasartuutinullu aalajangersimasunut allanut matussutissanik naleqquttunik.

*Imm. 3.* Aningaasartuutiviusut tunngavigalugit kiisalu najugaqatigiissinnaanermi iluaqutissat aallaavigalugit aningaasat aalajangersarneqassapput. Pilersuinnermut aningaasartuutinullu aalajangersimasunut pisortanit ikiorsiissutit annerpaamik SIK-p Naalakkersuisullu akornanni isumaqatigiissutit naapertorlugit ilinniarsimanngitsumut aningaasarsiarititat ikinnerpaaffisa 65%-erisinnaavaat, taamaattorli imm. 4 takuuk.

*Imm. 4.* Pisuni immikkut ittuni SIK-p Naalakkersuisullu isumaqatigiissutaat naapertorlugu suliamik ilinniagaqarsimanngitsut aningaasarsiaasa minnerpaat 65%-iat sinnerlugu ikiorsiissutininik

tunniussisoqarsinnaavoq, tamanna pisariaqavissappat qinnuteqartup ilaqutaasalu pilersorneqarnissaannut akiligassanullu aalajangersimasunut, naleqquttumillu ineqarniarnermikkut atugaqaannarnissaannut.

*Imm. 4.* Pissaaleqilerneq nammineq pisuussutigisamik pinngorsimappat, pilersuinnermut akiligassanullu aalajangersimasunut pisortanit ikiorsiissutisiaasussat affaannaat kisimik tunniunneqarsinnaapput. Ikiorsiissutit aningaasanngornagit tunniunneqassapput.

*Imm. 5.* Nammineq pisuussutigisamik pissaaleqisoqarpat aallaavittut taamaallaat tunniunneqarsinnaapput pilersuinnermut akiligassanullu aalajangersimasunut pisortanit ikiorsiissutissat affaannai. Pilersuinnermut ikiorsiissutit aningaasanngornagit tunniunneqassapput. Kommunalbestyrelsip naliliinnermini immikkut isiginiartussaavai meerartaasinnaasut pisariaqartitaat isiginiarneqarsimanersut.

*Imm. 6.* Naligalugu inooqatigisaq peqqussummi matumani paasineqassaaq katissimanagu inooqatigisatut, pisortanit ikiorsiissutiniq qinnuteqarnermi pisartagaqartup inooqatigisaa, tamannalu sioqqullugu sivikinnerpaamik ukiumi ataatsimi inuit nalunaarsorneqartarfianni najugaqatitut nalunaarsorneqarsimasussaq.

*Imm. 7.* Pilersuinnermut akiligassanullu aalajangersimasunut kiisalu immikkut ittumik pisortanit ikiorserneqarsinnaanermut Naalakkersuisut malittarisassanik aalajangersaasinnaapput.

**§ 14.** Qinnuteqartoq piffissap pilersuinnermut akiligassanullu aalajangersimasunut pisortanit ikiorsiissutisarfusup iluani ulluni ataasiakkaani aningaasarsisarsimappat pilersuinnermut akiligassanullu aalajangersimasunut pisortanit ikiorsiissutisiat annikillineqassapput. Qinnuteqartumut suna pitsaanerutinneraa naapertorlugu pilersuinnermut akiligassanullu aalajangersimasunut pisortanit ikiorsiissutisiat annikillineqarsinnaapput

- 1) ullut aningaasarsiaqarfusut ilanngaatilugit, imaluunniit
- 2) aningaasat tunniunneqarsimasut ilanngaatilugit.

**§ 15.** Pilersuinnermut akiligassanullu aalajangersimasunut pisortanit ikiorsiissutisiat pikkorissarnermi, katsorsartinnermi imaluunniit fagini ataasiakkaani atuartsinermut peqataanermi atuukkunnaarneq ajorput.

#### *Tunniussineq*

**§ 16.** Pilersuinnermut akiligassanullu aalajangersimasunut piumasaqaatit § 8-imi allassimasut atuutilerneranniit pisortanit ikiorsiissutit tunniunneqartassapput ulloq saaffiginniffik aallarnerfigalugu.

**§ 17.** Pilersuinnermut akiligassanullu aalajangersimasunut pisortanit ikiorsiissutisiat aningaasanngorlugit qinnuteqartumut tunniunneqarsinnaapput, aningaaserivimmut assigisaannullu ikineqarsinnaapput, taamaattoq takuuk imm. 2.

*Imm. 2.* Pilersuinnermut akiligassanullu aalajangersimasunut pisortanit ikiorsiissutisiat aningaasanngornagit tunniunneqarsinnaapput imaluunniit akiligassamik nassitsisumut toqqaannartumik tunniunneqarsinnaapput, pissutsit immikkut ittut tamanna pisariaqalersippassuk.

**§ 18.** Pilersuinermut akiligassanullu aalajangersimasunut pisortanit ikiorsiissutisiat siumoortumik ullut 14-ikkaarlugit tunniunneqartassapput. Taamaattoq akiligassanut aalajangersimasunut pisortanik ikiorsiissutit tunniunneqarsinnaapput piffissami akiligassat akilerneqarfissaasa nalaani.

*Imm. 2.* Kommunalbestyrelsi qaqutigoorluinnartumik piffissamut sivikinnerusumut tunniussisinnaavoq, qinnuteqartup ikiorsiissutit nammineerluni aqussinnaanngikkai naliliisoqarpat. Kommuunip naliliinnerminut atatillugu immikkut ilaqutariinni meeqqat pisariaqartitaasa iluaquserneqarnissaat pingaartissavaa.

*Imm. 3.* Pisortanit ikiorsiissutit tunniunneqartarnerat pillugu Naalakkersuisut malittarisassanik aalajangersaasinnaapput, tassunga ilanngullugu uppenarsaatinik tunniussinissamut malittarisassanik.

### *Pisuussutit*

**§ 19.** Kommunalbestyrelsi pilersuinermut akiligassanullu aalajangersimasunut ikiorsiissutisiaqartitsisinnaanngilaq qinnuteqartoq imaluunniit katissimallugu aapparisaq imaluunniit naligalugu inooqatigisaq, takuuk §13, imm.6, pisuussuteqarpata aningaasatigut pisariaqartitanut matussutaasinnaasunik, taamaattoq takukkit imm. 2. aamma 3.

*Imm. 2.* Imm. 1.-imi aalajangersagaq atuutissanngilaq:

- 1) Pisuussutit ilaat, ineqarnikkut atukkat attatiinnarnissaannut imaluunniit ineqarniarnermi pisariaqavissut anguniarnerinut, imaluunniit qinnuteqartup ilaqutariillu inuussutissarsiornikkut ilinniartitaanikkullu periarfissaat eqqarsaatigalugit pigineqartariaqarpata.
- 2) Pisuussutilli ilaat annertunerunngitsut, taakku siunertanut aalajangersimasunut nassuiaasikkanullu pigiinnartariaqarpata pineqartup atugarisaanut najukkamilu ileqquliussaareersut malillugit naammaginartutut nalilerneqarpata.
- 3) Sulisinnaajunnaarnek pissutigalugu taartisiat, taakku tunniunneqartarpata inuup ajoqusersimanera una naapertorlugu
  - a) pinerlunnernik eqqugaasimasunut naalagaaffimmit taartisiaqarnissaq pillugu inatsisip Kalaallit Nunaanni atuutilernissaanut naalakkiut,
  - b) taarsiinissamut akisussaaffik pillugu inatsisip Kalaallit Nunaanni atuutilernissaanut naalakkiut,
  - c) sulinermi ajoqusernissamut sillimmateqarneq pillugu inatsisip Kalaallit Nunaanni atuutilernissanut naalakkiut.
- 4) Pisuussutit iluarsineqarsinnaanngitsumik aningaasarsiornernerunngitsukkulli ajoqusernerup kingunerisaanik taartisiatut tunniunneqartut

*Imm. 3.* imm. 2-mi nr. 3 aamma 4-mi piumasaqaataavoq taartisiat pilersuinermut akiligassanullu aalajangersimasunut pisortanit ikiorsiissutinik pisartagaqartup pisuussutaanit allanit isertitaanillu immikkoortinneqassasut.

## **Kapitel 6**

*Immikkut ittumik pisoqartillugu ikiuutit*

*Ataasiaannartumik aningaasartuutit*

**§ 20.** Kommunalbestyrelsi ataasiartumik aningaasartuutitut naammaginartumik nassuiaaserneqarsimasunut ikiorsiissuteqarsinnaavoq, qinnuteqartup § 4-mi imm. 1 aamma § 8-imi piumasaqaataasut naammassisimappagit aammalu nammineerluni aningaasartuutini matuniassagunigit imminut ilaqtutamilu siunissami napatinniarnertut aalajangiisumik ajornartorsiulersussaappat. Nalinginnaasumik aatsaat ikiorsiisoqarsinnaavoq aningaasartuutissaq siumoortumik naatsorsuutigineqarsinnaanngitsumik pisariaqartinneqalersimappat. Taamaattoq ani-ngaasartuutitut siumoortumik naatsorsuutigineqareersinnaasunut kommunalbestyrelsi ataasiakkaatigut naliliinermigut qaqutigoortumik ikiorsiisinnaavoq, taamatut aningaasartuuteqarnissaq qinnuteqartup ilaqtuariilluunniit inuuniarneranni pingaaruteqarlunnartuusimappat.

*Imm. 2.* Aatsaat immikkut illuinnartuni akiligassanut kinguaattoorutitut matussutissanik ikiorsiissutit tunisisoqarsinnaavoq.

*Imm. 3.* Kommunalbestyrelsi aamma pisortanit ikiorsiisinnaavoq ilaqtutat qanigisat napparsimaneranni aamma/imaluunniit toquneranni ilisaanerannilu angalanissamut aningaasartuutitut. Kommunalbestyrelsimit piumasarineqarpat nakorsamit uppersaammik tunniussisoqassasoq, uppersaammik piniarnermut aningaasartuutit kommunalbestyrelsip akilissavai.

#### *Nuunnermi ikiorsiissutit*

**§ 21.** Kommunalbestyrelsi nuunnermut qinnuteqartup imaluunniit ilaqtuariit ineqarnikkut suliffissaqarnikkulluunniit atugaannut pitsaanerulersitsisumut ikiorsiissuteqarsinnaavoq, tamatumani qinnuteqartoq taassumaluunniit katissimallugu aappaa, akuerisaasumik aapparisaq naligaluguluunniit inooqatigisaa, takuuk § 13, imm. 6, aningaasartuutit akiliisinnaanngippata kiisalu qinnuteqartup § 4-mi imm. 1-imi piumasaqaatit naammassisimappagit.

*Imm. 2.* Kommuunimut allamut nuuttoqarpat, kommuunimit nuuffiusussamit kommunalbestyrelsimit akuersissummik pissarsisoqqaassaaq nuunnermut ikorsiinnginnermi. Taama pisoqanngippaat kommunalbestyrelsi nuunnermut ikiorsiissutit tunisisoq kommuuniussaaq ukiuni marlunni akiliissussaaq.

**§ 22.** Qinnuteqartoq Kalaallit Nunaanni najugaqavissuunngitsaq angerlarniarluni angalanissamut aningaasartuutit qinnuteqarpat qinnuteqartup kommuunimi najugaqarfigisaani kommunalbestyrelsi pisortanit ikiorsiissutit tunniussisinnaavoq, qinnuteqartup aningaasartuutissat akilersinnaanngippagit.

#### *Ilisinermi aningaasartuutit*

**§ 23.** Kommunalbestyrelsi ilisinermut aningaasartuutit naleqquttunut matussutissanik pisortanit ikiorsiisinnaavoq, aningaasartuutit pigisanit akilernerqarsinnaasimannngippata toqusullu piumasaqaatit § 4-mi imm. 1 naammassisimappagu.

#### *Napparsimasunut kaasarfimmiussutit*

**§ 24.** Pisortanit ikiorsiissutit napparsimasunut Nunatsinni Danmarkimillu napparsimmavinni uninngasunut kaasarfimmiussutit tunniunneqarsinnaapput.

*Imm. 2.* Napparsimasut Nunatsinni Danmarkimilu uninngasut kaasarfimmiusaannik pisortanik ikiorsiisoqarsinnaanerannut malittarisassanik Naalakkersuisut aalajangersaasinnaapput.

## **Kapitel 7**

### *Paasissutissanik pissarsiniartarnek paasissutissiinissamullu pisussaaneq*

**§ 25.** Kommunalbestyrelsip qinnuteqartoq pisussaaffilersinnaavaa suliassaq pillugu paasissutissanik pissarsinissamut peqataaqqullugu. Kommunalbestyrelsip pineqartup akuersineratigut inuit allat tassannga ilisimannittut paasissutissanik piniarfigisinnaavai.

**§ 26.** Pisortanit ikiorsiissutisisartoq pisussaavoq kommunalbestyrelsi ilisimatissallugu pissutsit atukkani allanngorpata, ikiorsiissutip annikillineqarneranik, atorunnaarsinneqarneranik utertittariaqalerneranilluunniit kinguneqartumik.

*Imm. 2.* Inatsisit allat ajornartinnigippassuk kommunalbestyrelsi pisinnaavoq pisortanit allanit paasissutissanik naliliinarnermut atugassanik pissarsiniarnissaminut, matumani paasiniarneqarpat pisortanit ikiorsiissutisisartoq ikiorsiissutininik pisartagaqarnissaminut pisinnaatitaajunnaarsimanersoq.

## **Kapitel 8**

### *Utertitsisarnek*

**§ 27.** Kommunalbestyrelsip pisortanit ikiorsiissutininik tunniunneqartussanngitsunik utertitsinissamik aalajangiissaaq, ikiorsiissutisisartoq:

- 1) Paasissutissanik kommuunalbestyrelsimut tunniussisussaalluni ilisimaarereerlugu tunniussisimannigippat, takuuk § 26.
- 2) Taamaaliortusnaanani ilisimaarereeraluarlugu pisinnaatitaaffiginngisaminik peqqussut manna naapertorlugu ikiorsiissutisisarsimappat.
- 3) Kingusinnerusukkut taarsiivigineqarpat, nalinginnaasunik akilersuutisisalerpat assigisaannilluunniit pissarsippat, piffissamut ikiorsiissutisiffigisimasaminut taassungalu assingusumik siunertalimmut.

**§ 28.** Aammattaaq kommunalbestyrelse pisortanit ikiorsiissutit utertinneqarnissaat pillugu aalajangiisinnaavoq:

- 1) Inuup aningaasaqarnikkut sulinikkulluunniit mianersuaalliorluni iliuuseqarnera pissutigalugu pineqartoq ikiorneqartariaqarpat.
- 2) Piffissami pisortanit ikiorsiissutisinissamik qinnuteqarfiusumi takuneqarsinnaappat qinnuteqartoq piffissap sivikitsup ingerlanerani pisortanit ikiorsiissutininik utertitsisinnaasoq.

*Imm. 2.* Kommunalbestyrelsi aalajangerpat pisortanit ikiorsiissutininik imm.1-imi nr. 2 naapertorlugu utertinneqartussanik, tamanna ikiorsiissutisisumut allakkatigut nalunaarutigineqassaaq kingusinnerpaamik pisortanit ikiorsiissutit tunniunneqarneranni. Kommunalbestyrelsi utertitsinissamik kinguartitsigallarnissamik akuersissuteqarsinnaavoq pisartagaqartoq aamma katissimallugu aapparisanilu imaluunniit naligalugu inooqatigisanilu pisortanit ikiorsiissutaannarnik pisartagaqarpata.

*Imm. 3.* Kommunalbestyrelsi immikkut pisoqartillugu ikiorsiissutisisalernermit ukiup ataatsip qaangiunnerani aalajangiisinnaavoq ikiorsiissutisiap utertitassanngorsimanera atorunnaassasoq.



## **Kapitel 9**

### *Angerlarsimaffimmi ikiorteqartitsineq*

**§ 29.** Kommunalbestyrelsip kommuunimi angerlarsimaffinni ikiorteqartitsinissaq aaqqissuutassaraa, taamaalilluni angerlarsimaffinni suliasatigut ikiorsiinissamut suliamut naleqquttumik piginnaassuseqarsorisanik sulisoqarluni ikiorsiisoqarsinnaaqullugu.

*Imm. 2.* Utoqqarnut, sanngiillisimasunut innarluutilinnullu kiisalu napparsimasoqartillugu atugarisatigullu ajornartorsiuteqartoqartillugu angerlarsimaffinni ikiorteqartitsisoqarsinnaavoq.

*Imm. 3.* Naalakkersuisut angerlarsimaffinni ikiorteqarnermik aaqqissuussinermut malittarisassanik aalajangersaasinnaapput, tassunga ilanngullugu angerlarsimaffinni ikiorteqartitsinermi akiliuteqartarnissaq.

## **Kapitel 10**

### *Naammagittaalliorsinnaaneq*

**§ 30.** Kommunalbestyrelsimit Inatsisartut matumani peqqussutaat malillugu aalajangiinerit Isumaginninnermut Naammagittaalliuqartarfimmut naammagittaalliutigineqarsinnaapput inunnik isumaginninnerup aquuneqarnera aaqqissuussaanelu pillugit Inatsisartut peqqussutaanni aalajangersakkat malillugit.

## **Kapitel 11**

### *Aningaasalersorneqarnera*

**§ 31.** Matumani peqqussut malillugu aningaasartuutit kommunalbestyrelsimit akilerneqartassapput.

## **Kapitel 12**

### *Atuutilerfissaa*

**§ 32.** Inatsisartut peqqussutaat 1. april 2007-imi atuutilerpoq.

*Imm. 2.* Tamatuma peqatigisaanik pisortanit ikiorsiissutit pillugit inatsisartut peqqussutaat nr.10, 1. november 1982-imeersoq atorunnaarsinneqarpoq.

*Imm. 3.* Maleruagassat pisortanit ikiorsiissutit pillugit inatsisartut peqqussutaat nr. 10, 1. november 1982-imeersoq tunngavigalugu aalajangersarneqarsimasut atuutiinnassapput, inatsisartut peqqussutaat manna imaluunniit inatsisartut peqqussutaat allat tunngavigalugit maleruagassanik aalajangersaanikkut taarserneqarnissaasaa imaluunniit atorunnaarsinneqarnissaasa tungaanut.

Hans Enoksen

/

Aleqa Hammond

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut